



Broj/Број: 03/1-50-1-9-29 /08
Sarajevo/Сарајево: 20.11.2008. godine

Članovima Zajedničke komisije za odbranu i sigurnost BiH

PREDMET: Informacija o radnoj posjeti članova Zajedničke komisije za odbranu i sigurnost BiH
Republici Austriji
Veza akt broj: 03/1-50-3-1078/08 od 23.9.2008.

U organizaciji Ministarstva odbrane Republike Austrije, članovi Zajedničke komisije za odbranu i sigurnost BiH (u daljnjem tekstu ZK) su, od 23. do 25. oktobra 2008., boravili u studijskoj posjeti Beču.

Iz Zajedničke komisije za odbranu i sigurnost BiH studijskoj posjeti o temi: „Mjere za zaštitu od katastrofe“ prisustvovali su: Šefik Džaferović i Slobodan Šaraba, zamjenici predsjedavajućeg, Jozo Križanović, Mirko Okolić, Vinko Zorić, članovi ZK, Dragica Hinić, sekretar, i Željko Grubešić, stručni savjetnik.

Iz Misije OSCE-a u BiH s delegacijom je u Beč putovala Jasna Dragičević.

Tokom studijske posjete Ministarstvu odbrane R Austrije, 23.10.2008., članove ZK pozdravili su general-major Gustav Gustenau, direktor Instituta za strateško istraživanje, i dr. Jorg Hofreiter, počasni konzul BiH u Gracu.

U Ministarstvu odbrane Austrije prezentirane su sljedeće teme:

- Uvod u pravni položaj o temi: „Zaštita od katastrofa“;
- Procesi odlučivanja u zaštiti od katastrofa u okružnoj administrativnoj upravi,
- Uloga savezne vojske R Austrije u civilno-vojnoj zaštiti i civilno-vojnoj saradnji,
- Uloga civilnih sigurnosnih snaga u civilnoj zaštiti i zaštiti od katastrofa,
- Saradnja Ureda saveznog kancelara sa civilnim društvom i institucijama u zaštiti od katastrofa.

Tokom prezentacija i razgovora s predstavnicima Ministarstva odbrane, Ministarstva unutrašnjih poslova, Ureda saveznog kancelara, Pokrajine Štajerske i Vojske Republike Austrije sagledan je sistem zaštite od katastrofa i sistem civilne zaštite Austrije.

Sistem civilne zaštite Austrije razvija se na lokalnom nivou. Potpuno je zakonski uokviren na nivou općina, okruga, pokrajina i savezne države. Jasne su nadležnosti i odgovornost. Civilne vlasti potpuno rukovode civilnom zaštitom i procesom zaštite od prirodnih katastrofa.

Analiza rizika je težište u pripremi planova, a nakon toga se definišu prioriteti i sposobnosti. Zaštita ljudskih potencijala i infrastrukturnih resursa je sistem koji traži punu koordinaciju što je osnova razvoja sektora civilne zaštite.

Na osnovu prezentacija i razgovora s članovima ZK, jasno je da je ključno pitanje u odgovoru na krizne situacije kako spojiti strateške partnere, kako znati stanje na terenu i kako koordinirati nosioce aktivnosti na terenu.

Posebno je zanimljiv koncept organiziranja dobrovoljnih i profesionalnih vatrogasnih jedinica u Austriji. Pokrajine ulažu velika sredstva u obuku ljudstva i nabavku opreme. Koliko lokalna zajednica ulaže, tolika je njena snaga na terenu.

Koordinacija rada u kriznim situacijama među pokrajinama i na nižim nivoima je odlična, a na državnom nivou je loša. To je zvanična ocjena učesnika studijskih predavanja i prezentacija. U toku je proces uvježbavanja, umrežavanja i koordinacije na nivou države. Gradi se jedinstven koncept i sistem bez sukoba nadležnosti.

Savezni sistem za početak treba da usavrši alarmni sistem i sistem koordinacije.

Prirodne katastrofe su izazov broj jedan u Austriji. Tek nakon tragedije u Černobilu počelo se razgovarati o odgovoru države na izazove koje sa sobom nose katastrofe.

Civilno-vojna saradnja i procedure angažiranja Oružanih snaga u sprečavanju i otklanjanju posljedica prirodnih katastrofa tema je koja će svoje mjesto naći u novim zakonskim rješenjima. Oružane snage postupaju u kriznim situacijama prema pravilima koja su donijele institucije civilnog društva i to je osnova veoma sadržajne civilno-vojne saradnje.

Tokom predavanja članovi ZK razgovarali su s predavačima, razmijenjena su iskustva i dati odgovori na brojne izazove, i lokalnog i regionalnog značaja.

Članovi ZK, 24.10.2008., posjetili su Školu za vatrogasne brigade u gradu Tullnu, Donja Austrija.

Tokom posjete upriličena je prezentacija rada Škole i njenih službi. Prilikom obilaska poligona za vježbu u krugu Škole prezentirana je praktična obuka vatrogasaca i pripadnika civilne zaštite. Savremeni poligoni, realna situacija u kojoj se izvodi obuka i njena masovnost, jer je preko 3% Austrijanaca učlanjeno u vatrogasna društva, što je podatak koji govori s koliko ozbiljnosti se pristupa problemu zaštite od prirodnih katastrofa.

Ohrabruje podatak o uspješnosti jedinica civilne zaštite na terenu. Lokalne zajednice su veoma ozbiljne u pripremi stanovništva za odgovor na krizne situacije. Tokom prezentacija u Operativnom centru za upravljanje katastrofama sagledan je sistem upravljanja katastrofama gdje nema onih koji su bez odgovornosti u zaštiti zajednice u kojoj žive.

Tokom 2009. godine 20 pripadnika OSBiH će po programu vatrogasne škole u Tullnu biti uključeno u rad seminara o temi: „Civilno-vojna saradnja u kriznim situacijama“.

Uprava Škole i pripadnici Ministarstva odbrane Austrije ponudili su brojne programe saradnje za sektor civilne zaštite u BiH.

Studijska posjeta članova ZK bila je izvanredna prilika za sagledavanje austrijskog sistema civilne zaštite. Prezentacije, prisustvo praktičnoj nastavi u Školi za vatrogasne brigade Donje Austrije i razgovori s predstavnicima Ministarstva odbrane i Civilne zaštite Austrije bili su dobro osmišljeni i dali su odgovor na brojna pitanja u ovoj oblasti.

Od ostalih planiranih aktivnosti u R Austriji nije održan sastanak s Edinom Dilberovićem, ambasadorom BiH pri stalnoj Misiji OSCE-a u Beču. Edin Dilberović je nekoliko sati prije planiranog sastanka porukom pravdao svoj izostanak.

Zamjenik predsjedavajućeg
Zajedničke komisije
Šefik Džaferović

